

續縣志卷三十四

人物志

理學

道學之名自宋史溯濂洛關閩淵源直接洙泗標正宗也贛之理學啓自曾陳北面濂溪月朔講學而郡人士始知所尚及黃正之從學陽明與何善山並當時評爲浙有錢王江有何黃然錢王之學再傳而失其宗重爲師門累惟江西踐履篤實謹守儒先矩矱此則其論著於前史者也舊邑志有理學文儒府志以儒林統理學王志分理學儒林文苑今仍各自爲卷而以著述在六經詩文之流傳者分附焉

宋

曾準字子中幼穎異篤志嗜學經史百家悉手抄口誦周元公判虔州準拜晤輒相契治坐談移日曰準不遇公幾以誦讀自誤矣由是潛心理道往復辨晰恍然有得乃語同邑胡玠陳貧臣等敦請元公月朔講學於郡明倫堂自此郡人士悉重理學嘉祐癸卯

贛縣志

志

卷三十四

理學

成進士判武功簿攝理獄事抗法不撓知公安火燔民居叩天反風滅火判臨江明慎刑獄園扉生芝草或勸以獻曰此偶然耳歷集慶軍節度推官知藍田所至有治蹟歸田十餘年論諸子當守元公之學或聖賢事業毋因循襲取功名爲也卒祀鄉賢子弼林開幾姪班俱登進士爲名臣

陳袞臣字廷輔資性素鈍力學攻苦終朝強記不數行又善忘因兀坐一小庵晝夜靜息澄心明理几席不設隻字久之若有所得聞曾子中北面周元公遂過曾所留與語曾矍然曰非復向日陳子矣遂與拜謁濂溪執弟子禮由是發明宗旨參究太極圖說經史百家俱一目數行下登治平二年進士

曾開字天游少好學善屬文崇寧二年進士第調直州司戶累遷國子司業擢起居舍人權中書舍人掖垣草制多所論駁忤時相意左遷太常少卿責監大寧監鹽井匹馬之官不以自卑召還時相復用事監杭州市易務除直秘閣知和州徙知恩州請祠得鴻慶宮判南京國子監復爲中書舍人罷提舉洞霄宮欽宗卽位除顯謨閣待制提舉萬



壽觀知穎昌府兼京西安撫使奪職奉祠建炎初復職知潭州湖南安撫使踰年求去復得鴻慶宮起知平江府廣東經略安撫使奉詔駐潮陽招捕處寇訖事乃之鎮居二年盡平羣盜提舉太平觀復以中書舍人召首論自古興衰撥亂之主必有一定之論然後能成功願講明大計使議論一定斷而必行則功烈可與周宣侔矣又論車駕撫巡東南重兵所聚限以大江敵未易遽犯其所窺伺者全蜀也一失其防陛下不得高枕而臥矣願擇重臣與吳玠協力固護全蜀屢請去進寶文閣待制知鎮江府兼沿江安撫使召爲刑部侍郎言太祖懲五季尾大不掉之患幾旬屯營倍於天下周廬宿衛領以三衛今禁旅單弱願參舊制增補之帝悉嘉納遷禮部侍郎兼直學士院時秦檜專主和議開當草國書辨視體制非是論之不聽遂請罷改兼侍讀常招開懋以溫言且曰主上虛執政以待開曰儒者所爭在義苟爲非義高爵厚祿弗顧也願聞所以事敵之禮檜曰若高麗之於本朝耳開曰主上以聖德登大位臣民之所推戴列聖之所聽聞公當強兵富國尊主庇民奈何自卑辱至此非開所敢聞也又引古誼以折之檜

大怒曰侍郎知故事檜獨不知耶他日開又至政事堂問計果安出檜曰聖意已定尙何言公自取大名而去如檜第欲濟國事耳然猶以粹宮未還母后欽宗未復詔侍從臺諫集議以聞開卜疏略曰但當修德立政嚴於爲備以我之仁敵彼之不仁以我之義敵彼之不義以我之戒懼敵彼之驕泰真積力久元氣固而病自消太陽升而陰自散不待屈也陛下之志成矣不然恐非在天之靈與太后淵聖所望於陛下者也檜曰此事大係安危開曰今日不當說安危只當論存亡檜矍然會胡銓上封事痛詆檜極稱開由是罷以寶文閣待制知婺州開言議論妄發實緣國事力請歸檜議奪職同列以爲不可提舉太平觀知徽州以提舉亳州明道宮以病免居間十餘年黃達如請籍和議同異爲士大夫升黜卽擢達如監察御史首劾開褫職引年請還政僅復祕閣修撰卒年七十一檜死始復待制盡還致仕遺表開孝友厚族信於朋友其守屢陽也從遊醉學日講論語求諸言而不得則反求諸心每有會意欣然忘食其留南京劉安世一見如舊訂交終身故立朝遇事臨大節而不可奪師友淵源固有所自云開子連亦



有時名(宋史本傳)

曾幾字吉甫準季子幼有識度事親孝母死疏食十五年入太學有聲兄弼提舉京西南路學事按部溺死無後特命幾將仕郎試吏部考官異其文置優等賜上舍出身擢國子學正兼欽慈皇后宅教授遷辟雍博士時禁元祐學術而以剽綴熟澗爲文幾思一洗之一日出內舍生陳元有經義與時作不類者誦於公卿之前諸公皆上聽稱善元有因得錄用文體遂爲少變除校書郎林靈素得幸作符書號神霄錄朝簪爭趨之幾與李剛傅松卿皆稱疾不往視久之爲應天少尹庭無留訟鬮人傳旨取金而無文書府尹徐處仁與之幾力爭不得靖康初提舉淮東茶鹽高宗卽位改提舉湖北徙廣西運判江西提刑改浙西又爲廣東漕先是張邦昌既死有旨月賜其家錢十萬於所在州勘支幾爲廣漕取其券繳奏曰邦昌在法當族得貸幸乃加橫恩如此不知朝廷何以待仗節死事之家有詔自今勿予兄開與秦檜爭和議去位幾亦罷逾月除廣西轉運副使徙京南路盜駱科起郴之宜章郴桂皆動宣撫司調兵未至謾以捷聞幾疏其

贛縣

志

卷三十四

理學

三

實朝廷遣他將平之請間得崇道觀復爲廣西運判固辭僑居上饒與侍講呂本忠居茶山寺七年不聞世故自號茶山居士檜死起爲浙西提刑去大猾吏張鎬死幾詰其一路稱快明年知台州治尙清淨民安之黃巖令受賄爲兩吏所持會吏寘獄一夕皆罪或曰令丞相沈該客也治之益愈賀允中薦召對以疾辭除直秘閣歸故治未幾復召對幾言士氣久不振陛下欲起之於一朝必須矯枉過直如有折檻斷鞅牽裾還笏若實直干譽者願悉加優容時帝懲檜擅權之弊方開言路應詔者衆幾懼有獲戾者先事陳之帝大悅授祕書少監繼承平時已爲館職去三十八年而復至鬚鬢皓白衣冠偉然每會同舍多談前輩言行臺閣典章薦紳推重焉詔修神宗實訓書成帝稱善權僉禮部侍郎兄栢開皆嘗試春官幾復爲之人以爲榮吳越大水地震幾舉唐貞元故事反覆論奏帝聽其言他日謂幾曰前所進陸贄事甚切已遣漕臣賑濟矣引年謝上曰卿氣貌不類老人姑爲朕留謝曰臣無補萬一惟進退有禮尙不負陛下拔擢上閱勞以事提舉玉隆觀紹興二十七年也除集英殿修撰又三年陞敷文閣待制金



犯塞中外大震帝召楊存中偕宰執對便殿諭以將浮海避之左僕射陳康伯不可存中亦言願率先將士北首死敵帝喜遂定議親征下詔進討有欲遣使詣敵求緩師者幾疏言增幣請和無小益有大害爲朝廷計正當奮胆枕戈專務節儉經武外一切置之如是雖北取中原可也前日詔諸將傳檄數金君臣如叱奴隸何辭可與之和耶帝壯之孝宗受禪幾又上疏數千言將召屢請老乃遷通奉大夫致仕擢其子逮爲浙西提刑以便養乾道二年卒年八十二謚文清陸務觀銘其墓上饒構兩賢祠祀之幾三任嶺表家無南物人稱其廉早從舅氏孔文仲武仲講學初佐應天時諫官劉安世亡蓋黨禁方厲無敢窺其門者幾獨從之談經論事與之合避地衡嶽又從胡安國遊其學益粹爲文純正雅健詩尤工有經說二十卷文集三十卷二子逢字原伯仕至司農卿逮亦終敷文閣待制自有傳而逢最以學稱逢子概登進士槩爲工部幾自贛徙河南府遂占籍而林開子孫仍居贛(宋史本傳)

宋史論曰曾幾積學潔行風節凜凜陳嘗胆枕戈之言以贊親征壯矣哉開同阻和

贛

縣

志

卷三十四

理學

四

議廢絀以沒無怨懟心所謂臨大節而不可奪者歟

文獻通考經籍中有曾吉甫論語義二卷朱子集註采其說載語錄中可考而本傳缺載萬姓統譜載文集五十卷方虛谷云公生元豐七年甲子卒乾道元年乙酉三子逢迅逮世其學吟咏則父子自相酬和清江三孔其舅氏陸放翁其門人呂倉部大器其婿而東萊祖謙其外孫也今傳中止言子逢逮而軼迅名史稱逢最有學而今亡其傳文清萬籍河南府洛陽志亦云其先贛人而萬姓統譜載其父曾準贛州人其從孫松章貢人朱子文集亦云曾準章貢人則其爲贛人信矣而江西省志乃以爲疑何耶郡城五世名臣坊爲曾氏父子公孫立今其子孫見居攸鎮譜牒歷歷可據也今林開幾俱崇祀鄉賢焉

明

劉潛字孔昭城西坊人少嗜學性端方讀經史必正衣冠正德八年舉於鄉會銅陵民有訟者多方勸釋之朔望講約親爲解說臨鄉則一蓋一輿裹蔬米以自隨鄉立一塾擇



子弟之秀者聚而教之時講學於明倫堂爲諸生辨晰精一危微之指參究太極兩儀之奧由是士知理學民知禮讓訟獄日希胥役貧不自給多求去潛令經制在官者勿去餘悉歸農例有羨耗悉除去歲以俸薪自給上憲察其賢交章薦潛力辭聞王文成公守仁講學於虔乞歸就道銅陵人士環泣遮留不得及歸里會守仁誓師鹿江潛趨謁行間聞致良知之說而學益精守仁曰劉君所學實措諸行事猶程子令晉城也惜未遇呂公不得大展所學耳家居十餘年郡學者多宗之（舊志）

黃宏綱字正之號洛邨先係本邑下橫人後徙零都舉正德十一年鄉試嘗曰聖賢千言萬語大要不越主敬二字一言一動必範於禮雖在燕居如對君師正德十二年王公守仁講學虔臺宏綱歸自計偕往調甫三日悟心理合一之旨遂列爲高弟十四年六月宸濠變起守仁倉卒整旅宏綱左右行間凡張疑設問必與謀之嘉靖七年戊子守仁卒於南安宏綱扶柩至弋陽適王畿錢德洪迎喪上嚴瀨遂同歸做築場義經紀其家居守三年以禮自衛越中學者皆以爲可宗嘉靖二十三年授汀州府推官明刑勅

贛

縣志

卷三十四

理學

五

法一無所徇尋入爲刑部主事時塞上多故將校下獄者吏率刻深以逢上意宏綱按法不輕上下以故不爲人所喜遂拂衣歸每歲放舟青原與鬻豹鄒守益羅洪先諸人尋繹師學有所請質者瞠視注聽俟衆論既畢徐擇一二言正之不競談以炫所知意態含蓄未易涯涘當時陽明之門夙有評曰江有何黃浙有錢王謂宏綱與廷仁也宏綱之學再變始者持守甚堅其後以不致纖毫之方一順自然爲主生平厚於自信而薄迎合長於持重而短機械蓋望而知爲有道者也年七十卒學者稱洛邨先生著有洛邨集及語錄行世（參明儒學案）